

傳
經
堂
詩
鈔

傳經堂詩鈔卷六

庚寅至壬辰四月

蕪湖韋謙恒慎旃

四照樓下多隙地種樹十餘本連日得雨生意可觀漫成二絕句

十年樹木計成難澆溉辛勤我獨殫但使成陰能似幄儘教留與別人看

費煞天公雨露滋眼前生意竟如斯待他李實桃實後應記先生手種時

惠民道中

按部初經古棣州漢家循吏蹟猶留千村細雨收魚蛤

一逕斜陽見犢牛
澤國生涯需擘畫
海邦風景費咨諏
從來瘠土能思善
却喜彬彬媿魯鄒

三月十日聊城清明

三月十日好天氣
欲雨不雨桃未開
彈指便過寒食節
放懷何處魯連臺
老顛畢竟因春甚
鄉思無端逐酒來
遙憶鹿門方上冢
松楸鬱鬱覆蒼苔

時八弟方歸省墓

東昌邵博董曲江

元度

以庶常出宰安遠旋改

校官聞其造士有法賦詩贈之

校書天祿力曾殫
老去重看苜蓿闌
好繼河汾爲教授
敢呼屈宋作衙官
論文却喜三春永
味道寧嫌一飽難

莫訝先生偏口吃，譚經滾滾正翻瀾。

謁曾子祠

洙泗淵源一脈真，遺祠肅拜仰傳薪。
夢狸早信能爲子，投杼元知不殺人。
金石祇今疑奏雅，冰淵終古悟持身。
豆籩未敢陳羊棗，猶想依依孺慕新。

太白酒樓

唐代斯人少，千秋氣未殫。
試看天寶末，誰薦令公才。
落同狂客哀歌獨，酒杯登樓空悵望。
不見錦袍來。

寧陽道中望嶽

我登泰山巔，去年春之半。
詰曲十八盤，人影白雲亂。
峒

巽入天門徘徊在目觀邈焉隔塵凡形超骨亦換仙境
難久留小別竟如幻惟有清夢間往往到霄漢燭來渡
汶水忽與岱嶽見依稀丈人峯清光落人面畿輔方望
澤

宮中厯宵旰鄒魯膏春膏已足飽麥飣不雨幾一月大
田亦小旱稽首呼山靈黔首良足眷安得膚寸雲爲雨
天下徧

四照樓雨中望歷山

極目何空濛依稀歷山下遙知風雨聲中有荷鋤者

庚寅初度述懷

大衍才過頭漸白老夫筋力覺龍鍾十年誰共牛衣卧

喪偶以後獨居十載矣

百計猶虛馬鬣封

時營夫窀穸未就

先大稍喜譚經

宗伏鄭敢誇學道接喬松

道氣接松喬富仁軒中丞見贈句也

諸生莫浪

陳歌頌終媿人師爾未逢

自題秋林講易圖

并序

濟南使院在大明湖東水石清幽致有佳趣新秋

雨霽校士餘閒偕兒子

協夢協中

學易於坳芥亭

因爲秋林講易圖并題五言二首

平生嗜墳典一編每獨把矧以退食餘坐我秋樹下清

光盈胸懷水木自瀟灑蓬髮有二子詩書爲陶冶易學

傳九世

自先來亭公治易今九世矣

詎敢頓喑啞程邵吾兼師焦京

汝姑舍居則玩其辭鳴鶴象可假惟期樞機慎庶幾悔吝寡安能病包犧效彼負苓者

善易不論易斯言古亦有吾惟未善易斷斷乃在口錫名憶先人俾我終身守拳拳五十年頃步無敢苟小子躁未釋道蘊詎能剖卦以未濟終於義何所取三陽皆失位微言倡筏斐小狐濡其尾戰兢斯无咎以茲持爾身或可昌我後他時當致亨有孚于飲酒

趵突泉卽事二首次劉青垣編修韻

威沸寒泉湧跳珠濺曉嵐誰知秋月九忽共客星三

時劉

徐兩公同
翠嶂真堪挹黃花况可簪劇憐清似鑑頑影

向深潭

深源從此導小住亦因緣秋喜流觴好人欣出郭便仙蹤聊細數活木試親煎歸路迎新月何妨緩緩還

九日同劉青垣徐杏池兩編修登歷山次壁間

韻

登樓每爲對山光

署中四照樓與歷山對

九日欣然此命觴洞古

暗添風獵獵秋深猶見物昌昌清泉歎薄園荒寺短堞
參差送夕陽龍象漫嫌冠蓋俗杖藜吟斷晚煙蒼

徂徠山下作

我行徂徠下望見徂徠巔微雲幕孤岫遙與秦岱聯何
人此譚道結茅心悠然巖巖凜勁節詎僅耽林泉平生
慕高蹈日暮空流連唯聞松濤響諛諛穿寒煙

平易集

在賈縣

連朝行犂硯此地忽平沙歸樹鳥聲急趨墟人影斜村
烟新月抱山色暮雲遮欲檢輿圖問潁臾或是耶

少陵臺

豪華轉眼卽塵埃千古詩名未易灰爲問靈光殿安在
巋然獨見少陵臺

曹州咏瓶中蠟梅天竹

南華景物逼人清斜倚瓶花酒細傾已見黃梅第五朶
更參天竺古先生冷香忽向春前動赤玉偏從雪後明
却想妖嬈三月暮綠遮紅襯太風情

謁卜子墓

夙稟西河教茫茫緒可尋流風終古在落葉墓門深後
素窺宗旨先傳見苦心倘容供灑掃六義試微吟

湛然齋四詠

木瓜

幽香壓秋林遙從西徂送瓊琚報未能風詩但微誦

佛手柑

愛此梵羅棉逆風香不已香從何處來妙悟在一指

水仙

翩翩遺世姿洛靈之所化欲倩八斗才更寫花光姹

素心蠟梅

虛白在中含黃冠乃其貌惟有素心人堪與相視笑

應

制賦得泰山不讓土壤

嵯峨瞻泰岱峻極冠羣峯須識高無際都緣量有容纖埃端不讓片壤亦堪封捧土心徒切包荒德獨鍾幾曾辭一撮更覺聳千重嵩華難爭長云亭許附庸九泥虛

可受觸石雨先從

聖主符元化巍巍萬國宗

應

制賦得大禹泣辜

夏后崇明德醇風被朔南懸鞞情正切繫梏見何堪偶
爾逢衣赭愀然爲駐驂一夫如已溺雙泪獨心慙詎曰
無辜累惟希有道含欽哉刑恤五繼者網開三須識生
爲德還期樂共耽

聖朝聲教廣萬類荷

恩覃

蔡松霞糧使署齋席上有作時蔡巡撫臬尚未
得代也

暫停征騎共婆娑芍藥香濃細細過明月始知今夜好
春風偏向客中多黃鸝紫燕關情甚碧酒紅燈奈別何
他日牂柯江畔路雙魚應爲託微波

棣州絕句二首

一犁新雨送征輪問俗重過渤海濱却喜沿村臺笠聚
更無佩犢帶牛人

吟興頻從馬上生羊蘭城外不勝情高三十五今誰似
五十論詩得正聲

夢愚堂懷愚山先生

并序

堂在青州使院施愚山先生提學時所題額庭前
二楸樹亦其手植也去年秋旣從都人士之請祀
先生於大明湖茲駐斯堂乃爲詩弔之

宣城丰骨玉嶙峋講學流風跡未湮雙樹獨聽深院雨
百年猶見後堂塵空將俎豆酬遺澤媿少文章作替人
惟有平生慕高節寸心秋水共清淪

黃縣道中

漢縣名猶在東臯雨霽初嵐光侵客騎海氣接征裾土
沃安耕織村深富蛤魚輭睡何處是更欲證方輿

題登州使院道東齋

古郡依東海高齋署道東人知尙經術吾獨媿宗風霜

雪鬢空點

余於前歲試登州鬢髮未華今則鬢已全白矣

丹鉛意未窮相期歸

大雅通德里應同

勞山篇

并序

勞山三面跨海巖壑幽峻不可名狀自青蓮賦詩
後探奇者鮮不目爲神仙奧區焉余以辰酉未到
爲憾頃得勞山圖一幅卧遊竟夕覺層巒疊嶂了
了目睫此心超然在大勞小勞間矣爰作長歌繫
於圖後

我聞勞山崩男削天半橫跨東瀛作几案深巖絕壑難
悉名毋乃蛟蜃精所幻使者兩度來東萊矯首但見層
雲堆惜哉相距二百有餘里欲往從之空徘徊夜闌忽
展勞山圖峯巒歷歷皆仙都獅子巖前飛鳥絕玉皇洞
口松風俱想見山中紫霞徧山麓時有仙人騎白鹿安
期之棗大如瓜一聲長嘯滿陵谷不知何物妄男子無
端欲附長生籙連弩親齎漁具來虛教擁鐻山靈辱講
經翻憶鄭康成當年高卧不其城挾策遙知此臨眺飛
仙橋畔獨有千秋萬古情何時直造巨峯上俛瞰鯨鼉
生萬狀紅雲一片擁朝暎海水茫茫恣滉漾學仙終古

成癡頑詎必服食求朱顏惟有登高望遠興不淺願將
洪濤萬頃收入胸懷間嗚呼安得天上謫仙人尙在相
與幕天席地日夕卧對海上三神山

試灘縣童子得孫生斐年已八十有五矣而視
聽不衰筋力亦健殆有所以養之者

瘦削秋山老筆成白頭才得附諸生漫言古貨今難售

古貨今難賣歐陽文忠句也人瑞真堪獻

聖明

論年我合以兄事問字翻充弟子行一笑相攜爲老友
從容更乞養生方

萊州海神廟

按齊乘東海淵聖廣德王廟在萊州西北二十里宋開寶六年重建

今正其地也

洋洋碧澥靜無波海上靈祠鎖薜蘿
九瓠澄清歸壑易三山縹緲隔雲多
高樓日暖長鯨偃古殿煙寒乳燕過
見說居人勤報賽更塗丹雘意如何

時與守令議新之

望海樓

極目滄溟遠樓牕四面開潮聲催日上
水氣雜雲來島嶼檐前列桑麻檻外栽
海隅皆樂土底事訪蓬萊

淄河行

自東徂西千里餘日行犂确穿崎嶇
其中有水七十二

淺深各異涉亦殊或駕長杠杭一葦或以馬躍或車驅
唯有溜河太奇特涸時清淺如蓬壺觸石膚寸崇朝雨
巨川驟若萬馬趨縱橫曲直唯所向俄頃忽成江淮湖
茫乎不知其畔岸洪濤兼挾砂石俱剝木爲舟技安用
駕鼉爲梁術更無居人但歌公無渡行者四顧徒睢盱
誰知乍盈亦乍涸電光石火才須臾奔騰汎濫不三日
微波一勺玻璃鋪昨聞急遞凶滅頂褰裳欲往心趑趄
我來水已歸大壑中流蕩漾同康衢深者纔能及馬腹
翻疑傳聞皆失誣時止時行適然耳至人相與委蛇虛
吾生敢冀占利涉終身寶之唯中孚

余於己丑春往來章邱鬢鬢如漆荏苒二載遂
至霜雪盈盈今重經其地見者無不驚訝口占
二十八字

三載觀風過此邦女郎山外擁旌幢獨憐鬢鬢今如雪
無復青青照繡江

余以先人未葬不忍有室故喪偶後誓不再
娶顏所居曰法喜今忽忽十二年矣漫成五言
十四韻題法喜庵壁

我豈元德秀亦非陽行先絃斷不復續茲事有由然
先人厝淺土彈指三十年安忍問鏡臺誓將營墓田老

鰥逾一紀霜雪盈華顙無端致客難欲語空涕漣琴瑟
詎不好松楸尤所牽倘能卜吉兆俾我依牛眠擁書數
千卷架屋三兩椽晨夕捧麥飯鞠脰如膝前此生願已
足周妻何有焉天女散空花鈍根寧能宣虛室名法喜
妙諦難言詮一絲本不挂聊爲口頭禪

辛卯鹿鳴宴用山谷觀伯時畫馬韻

頻年

國慶大典行工歌鹿鳴非新聲階前羅拜玉筍橫水沉
細炷香欲透中有儒官苦吟瘦

是科校官獲
雋者五人

割肉好歸

薦發豆中丞門前鳴花驄休將得意誇鄰翁明年看取

宮袍紅

贈梁生鴻翥

并序

梁生字志南德州人貧而好學所著有周易觀運
及易書詩春秋儀禮周禮禮記條辨等書百餘卷
年逾五十足不越庭戶州人罕見其面庶幾經明
行修者學使例升優生於成均余以生爲舉首并
贈以詩

兩漢重經術儒風盛齊魯卓哉鄭康成心苦爲訓詁六
籍賴以昌儼如日亭午奈何弃漢學讀書太莽鹵使者
來采風浮夸屏弗取篤行推梁生廣川有遺矩下帷不

窺園鑽研力獨勞不知厨無煙但期腹可挂接討及箋
疏辨證窮帝虎輩作相勸帥歌聲出蓬戶後生好捷走
斯人足砥柱

當今經學明珪璋羅天府敢以獻

彤廷俾之摩石鼓鴻漸占上九行當用其羽

九日酌笑泉忽憶去年今日與諸公登歷山賦
詩今皆別去不勝聚散之感因用東坡九日至
勤師院二首韻題壁

莫訝秋霜兩鬢侵品泉聊復汲清深曲池浪湧還如舊
斷碣苔封好細尋水樂詎關絲與竹道緣休問石耶金

閨中祀呂祖有談點
金術者故戲及之
故人幾處分南北把臂曾同笑入

林

去年並馬白雲堆九日登臨亦快哉北海銜樽唯我在
東籬嗅菊更誰來也知松柏心長共且對茱萸眼乍開
何日風前更高會天涯搔首一裘回

九月三十日周熒堂中丞署中泛舟至珍珠泉
試茗用東坡泛潁韻

幕府遊已熟斯遊乃逾奇後堂置小艇缺瓜橫水湄知
我煙水癖一笑療我癡秋風送微涼澄波弄仙姿輕槳
任所適得意偏遲遲宛如對明鏡詎僅歌漣漪蓬萊在

人世舍此復問誰儵忽見水底跳珠濺須眉鮫人不愛
惜弃置乃在茲錯落千萬琲遊魚銜之嬉又豈麻姑擲
效彼狡獪兒清光觸人來擾之何能緇要令入肺腑玉
川真我師七椀意未足聊吟餞秋詩

山東鄉試諸生汶上郭毓麟年九十一壽光董
書宗年九十濰縣孫斐年八十五皆蒙

恩賜舉人

慈闈集慶皓叟彈冠從來未有之

殊恩也賦七言一章恭紀

洛中耆英十三人皆逾七十無八旬

耆英會中唯富鄭公最長纔七十九

耳誰知山東大選士
耄耄聯袂來彬彬
人三爲衆若鼎足
共年二百六十六
少壯頻瞻

聖祖顏

三生自言
祖南巡時屢曾瞻就

聖雨露

三朝蒙樂育

恩綸特賁登賢書
方瞳皓首樂何如
願上

慈寧億萬壽
含哺相與歌康衢

十月二十四日余去濟南諸生餞送者絡繹數
十里禁之不能迨至齊河乃堅止諸生毋更前
兼示以詩

平生抱孤介
面目冷如鐵
不欲苟悅人
敢冀人盡悅
矧

承

天子命海岱汝持節董勸苟弗明佻達安可絕遂將勤
懇心化爲廣長舌閑檢罔或踰衣冠其毋裂經籍窮根
源文章戒疲茶多士敬而聽凜凜未敢褻乍覺束縛苦
久乃趨嚮切搗染及三年服習泯言說城郭多絃歌鄉
曲徧茅蕪蕭艾旣不萌蘭蕙日以茁網羅得英俊騰蹕
有耄耄初彭齡實汝翼以
董書宗孫斐以耄年召試賜舉郭毓麟
殊數私喜也

聖澤宏宣揚免叨竊今我將還

朝依依惜離別追送若恐遲夾道子衿列回頭語諸生

吾道有圭臬樹立期不凡功利非所屑試看杜陵翁許
身唯稷卨子歸有餘師我車胡能繼會晤良不難舊會
幸勿輟

十一月十五日夜寶善亭齋次卽事

三載重來卧玉堂沉沉清漏近官牆青藜幸許依劉向
白髮翻勞感遂良

諸城院長齋宿見余
黃髮皆白怪而問之

預識南郊儀具

舉更欣北陸日將長眼前上瑞先須紀六出霏霏夜滿
廊

宮傳香樹先生爲題 先子授經圖依韻奉謝
世無蔡中郎誰銘郭有道幽光闕泉臺理窟本深造所

期無媿辭詎徒耀文藻吾師筆千鈞能迴狂瀾倒閭揚
我 先子真意出詞表舊德在一經安知計溫飽儒官
雖云卑志行畧可考憶昔循南陔挾筴年正小俄頃悲
枯魚儀容隔仙島箇猶未能鬢髮忽已老夢想三春
暉脈脈惟寸草一言等華袞子孫幸永寶

十二月二十八日同鄉念喬侍講致齋清秘堂

作二首

歲晚相依向木天公方強盛我華顛見恒河性還如昨

蘇詩見恒河性故依然

忽忽東華十五年

侍講丁丑入詞垣余亦於是年奉職薇省

先後臚傳傍玉墀北扉齋宿許追隨燈前細數

恩光重話到天街走馬時予於侍講爲後進皆以第三人及第

送沈叔園廉使之皖江講席

我昔誦公詩恨不見公面昨聞齊魯間歌頌在郡縣斷
獄多平反糾吏除鍛鍊迺知經術深非僅春華絢竭來
趨彤墀朝衣點微霰

慈寧介曼壽舞蹈羅碩彥瘦鶴何矯矯握手倍繼繼神

交已卅載風采今始見公年政七十炯炯眸似電坐卧

擁書城苦吟夜忘倦令子退直餘謂南霜儀部晨昏奉珍膳

庭前茁靈芝時座雙芝上瑞衆爭羨鬱鬱書帶草今古共葱

蒨潞河生淥波歸心逐帆片遙指皖公山講堂列狂狷

桃李花正繁春風拂滿院安得依皋比譚詩別正變

余因僦屋未得暫假陳文恭公故第與蔣編修
朱庶常同居忽忽兩月將以明日移至城西上
元酒罷走筆識別兼寄公孫松山比部

三人共占平津第南北中央總不殊祭竈迭更爲主客

趨朝爾我互催呼地鄰燈市春風簇第去燈市
僅數武人對

星橋別思俱更憶閉門陳正字低徊祖德撚吟鬚

花朝獨遊永樂庵

戊子春日曾與周黃
李三同年讀書於此

宣武門南芳草綠翦翦春風吟不足永樂庵中花可人
都簾蠻榭爭討春當年禪榻聯厨顧高歌那管旁人怖

今日花朝只獨來蒼苔空見題詩處

題李義山詩集後

一首南山老筆成爭如杜老淚縱橫千秋若欲求詩史
合把西郊配北征

三月七日出都示協中兼寄協夢

我鬚雖云自我力猶未衰馳驅固吾分况蒙
特達知明刑膺重任褒予荷

聖慈

顧問我先世下乃及妻兒

恩眷有如此感激唯涕垂誓將身許

國何能顧其私念爾來遠送欲別不忍辭一言用相勗

小子敬聽之吾家有世德俎豆入鄉祠先深道公
春麓公
寓庸

公廣庵公逮我祖我父先大父宰新鄭士民
懷德建祠立碑
先考

分教泗州金壇溧陽所清芬衆所推孝友作模範典籍
至有聲均詳郡邑志

為裴箕自媿才力薄仰承堂構基少小失怙恃儻弼安

所資支子本孱弱諸兄皆嫡子自余以
周太淑人出舉足皆艱危唾

面不敢拭出勝空含悲倉黃渡江水落扣行天涯乙丑
始寓

全耿介有本性顛沛未或違青瑣幸通籍丁丑
巡召試蒙
南

中書思官白璧益自持拜塵畏如火飲米甘若飴但恐夙

夜解或致羞辱貽年來祿逾厚彌凜滿則歆滇南去鄉

井萬里山崖屢方以孤直矢寧容家累隨爾年甫弱冠
宛轉趨庭聞爾兄續鸞膠暫寄淮水湄夢兄贅吳淞
河帥署中夙
昔共枕被伯仲吹壘笳愁思非所慮樹立貴及時背
有故物經術堪畚缶扁舟且歸去傲廬聊相依程卓詎
足羨軾轍真我師守身斯爲大樹德莫如滋車澤人必
瘁戰勝身乃肥惡木慎勿息素絲其毋緇刻鵠尙類鸞
養雞當守雌三緘銘不忘萬石風可追人生非鹿豕胡
爲歎別離努力寶明訓歡聚良有期揮手去天末吾馬
不可羈

過慈航寺弔方恪敏公寺在安肅道中爲恪敏

所葺邵民卽其地爲祠以祀公

當年叅慧業十笏偶經營猶有春風滿時聞梵唄清平生空結契迴首不勝情見說祠堂畔居民涕淚橫

行至滎澤聞河帥姚公小坡方在南岸急乘舟濟河而公已北渡晤楊邑侯廼知公遲余良久旣感其意益用悵然賦詩奉寄

桃華春到水無波廣武山前使節過畚千村閒荻葦旌旗一帶靜鼉鼉良緣竟向中流阻此別真成萬里多孤負故人相遲久一尊何日共高歌

新鄭縣作

并序

新鄭居鄭許禹三州間地衝而瘠 先大父以康熙乙亥來宰是邦竭力撫綏民樂其業旋復奉檄轉饌晝夜持籌輓輸及時弗以秋毫累百姓鄭人德之爲建祠立碑謙恒赴滇取道茲土有老人年九十餘曾侍 先大父聞余之來愀然相告且言鄭人呼生祠曰子公祠蓋以韋爲子其土音也敬成小詩題於碑側時乾隆壬辰三月二十三日
漆洧橋邊暫解鞍 先人餘澤未銷殘空聞故老掀髯話獨對遺碑忍淚看椒醕到今爭拜舞羽書當日正難音容邈矣貽謀在七十年來指一彈

頽橋懷古

驅車過頽橋臨風懷考叔考叔末吏耳千載慕高躅鄭
莊寘母非人情微詞能使感悔生廼知至性堪寤主此
事豈可口舌爭人生奉檄爲親喜願請君羹作滌髓不
然終日對鼎烹何如一杯承菽水世間肉食徒紛紛倚
閭空使親心勤惜哉頽谷封人語不遣西河郡守聞

襄陽樂

峴首山前漢川潯重鎮當年說羊杜爲釣槎頭縮項鰻
漢上新添六檣船天寒水冷鰻難捕漁女含酸向誰訴
日腹之累今已除襄陽太守食無魚太守無魚亦不惡

沿村但道襄陽樂襄陽樂事難具陳月明先聽漁歌新

峴山亭

漢水滔滔抱郭門襄陽耆舊更無存賢愚漫道同銷滅
只有羊碑帶淚痕

王粲井

聞說誅茆枕碧流仲宣身世不勝愁空餘石井欄猶在
苔蘚曾經六代秋

荊門州欲訪蒙惠二泉不果

夙聞荊門西蒙惠二泉別一寒而一溫終古共澄冽不
受萬物滓乃照衆形澈泉源何處來涓涓流不竭下馬

欲訪之好雨未肯輟江漲正洶洶幾與渾河埒泥沙入
茗椀欲飲復卷舌誰能致清泉使我對冰雪

江陵道中書所見

荆人事游惰我聞東坡言種麥不種稻子由亦云然誰
料今作苦迺欲勝越人茲來值初夏時雨灑浹旬東阡
與西陌臺笠何紛紛婦子各努力相與耕且耘不憚泥
沒踝但期稼如雲江水滿大澤微風吹碧鱗將以灌南
畝詎敢辭艱辛柳陰踏龍骨咿啞聲遠聞擬金更伐鼓
田歌喧四鄰手足縱勞瘁笑語彌歡欣力田旣如此降
康奚疑焉遂令天下足翻賴楚有年

諺云湖廣熟天下足沃野數

千里食飲安愚屯固由俗務本要在勸董勤北條水旣
治利與東南均節宣得其道浸灌良甚便齊魯與鄭衛
何不興稻田憶昔南陽守疏鑿勤吾民課耕每露宿爲
堰有六門至今猶蒙休陂塘澤未涸不知牧民者孰如
召信臣腐儒不曉事敢將蒼生論殷阜羨荆楚聊備風
詩陳

澧州訪梁冲泉觀察不值乃於武陵相遇

五載分襟類轉蓬澧蘭空爲訪幽叢何期間渡來溪畔
聊復搏沙向雨中執手漸看成老大持身相與勵公忠

上堂慙媿傳衣鉢

憶癸未臘唱後吾師文莊公笑謂余曰吾與汝皆以第三及第當以衣

鉢付
汝矣
端的郎君有父風

桃源道中水車行

并序

狀如風輪編篾爲扇繫竹筍於扇旁置之急流使
水激之自轉竹中皆箇水倒注又破大竹之半爲
丁字橫堤上若承霤然瀉入田間不用人力蓋巧
之至者賦水車行一篇

風輪忽置灘河衝湍流激轉疑飛蓬呶啞亂捲翠浪空
抱節君以虛能容倒挽溪水入碧筒宛若瓠觥檐牙崇
銀瓶迸落流淙淙斷竹續竹呼噏通如屋有霤歸田中
高原竟與下隰同秧鋤一望彌青葱以水餉水人無庸

馬均枉費翻車董

馬均始作翻車令董轉之却笑物而灌水自覆見太平御覽

古未工我聞桃源桃華紅漁郎曾此尋仙蹤灌田之術

何其憊太巧毋乃惱天公詎知澤以說爲功因勢利導

斯善農人間水利真無窮前村又見水自春

白香山詩雲確無人

春水自

將之沅州以雨大不能行遂宿羅舊驛先寄睦

翹林太守

咫尺沅江未許過暫從驛館息鈴騾乍看城

未到梅黃雨已多斑竹叢中留客夢亂山

故人顏色今猶隔先問吟情近若何

傳經堂詩鈔卷六終

傳經堂詩鈔卷七

壬辰五月至二

玉屏縣二首

入黥第一程也

荆楚山容次第看，玉屏又爲綠烟纏。詩人結習真難盡，逢著青山便倚闌。

鬢髮蕭蕭雪漸添，晚來頻嚏不須占。鼻嚏耳鳴難占十六卷見漢書藝文志祇應兒女燈前話，算到今朝正入黥。

陸緯歌

并序

黔山陡削肩輿不能上，乃繫二繩於輿之左右，使人分曳之以佐輿人。名曰緯夫。余憫其勞，因爲之

歌

犖犖确确穿山坳居人騰越如飛猱肩輿送我巖邊宿
若遵大路忘其勞忽見懸崖插千仞興臺趑趄不得進
短纜聊同上瀨船長繩畧似服箱紉一夫邪許衆雷同
牽挽直到層霄中蝸角雙雙向人面蝦鬚裊裊當晴空
行步雖工力已竭白汗翻漿僅免蹶枉希代馬強追風
翻類吳牛驚見月峯頭已過喘未停息稍相與趨郵亭
得錢幸足供醉飽小人勞力古有經棄馬用人我心忤
肯惜傾囊爲軟腳安得更籌衣食源俾爾長享田家樂

相見坡

一坡又一坡亂石何齒齒下下復上上僕夫汗不已回頭顧我徒徐行恐錯趾了了見其面相隔已十里

題飛雲洞四絕

誰將泰山雲幻作洞石古夜深應更飛去爲天下雨
本以石爲身翻若雲之狀雲耶與石耶孰是眞實相
頑石與慈雲佛性本相等說法逢生公石亦當首肯
巨石何玲瓏巖壑中畢具送與米襄陽此間作常住

阿都田見月

坡陀五十里馬瘡僕亦憊荒村不數家隱隱接苗砦望
門卽投止那復計卑隘回首望鐵關崩男插雲外不信

從此來放眼窮兩戒呼吸通天閭險中得一快姮娥知
客眠夜半撥鬢黠皓魄穿疏櫺送入我懷內自從到黔
中十日九陰晦誰知深巖間忽與蟾蜍對月光得山氣
皎潔乃逾倍攬衣獨徘徊終宵不能寐

諸葛武侯祠

在尋甸
州關嶺

草廬曾問古南陽遺像今瞻峻嶺旁早識金刀終蜀道
獨留銅鼓震蠻方綸巾羽扇風流在黛色霜皮手澤長
祠外有古柏輪囷
相傳爲侯手植聞道南人心膽懾年年猶爲奠椒漿

嵩明道中題毒泉碑後

碑云此係毒水飲者傷
生或言今已無毒故書

其
後

泉水流山根望之清且澄云何能殺人一酌遂滅性將
母百怪宅誰爲照犀鏡老婆心獨切題碑警衆聽僧雛
不曉事訛言毒已淨虵蠍不螫人此論恐未定何如絕
勿飲毋戕我民命

海潮寺坐雨

招提橫古道冒雨一登臺泉作潮聲湧雲疑海氣來毒
龍應早制王摩詰詩安禪制毒
龍寺旁有毒泉故云怖鴿不須猜誰解真如
妙吾當問大梅

余素有吟癖戒不數月輒復如故或以苦吟進
規作此示之

平生寡嗜好寂坐逃枯禪文字作遊戲安計醜與妍屢
戒不能止時還聳吟肩譬彼嗜酒者醉輒抱甕眠不知
飲何好浩浩全其天竭來事行役山水供流連不許萬
緣觸得句心悠然下筆挾風雨過眼隨雲煙性靈賴陶
寫道路忘阻艱僮僕強解事請勿疲心神少陵作詩瘦
聞諸李青蓮爾特知其一試更聆我言人生各有寄外
物不能遷所喜好吟弄差校博奕賢縱類阮孚展何如
和嶠錢若欲併此已移情聲色間斧斤伐我性得失恐
相懸高咏復長嘯皓月生前川

寶雲亭對荷

萬里客初到一池花暗香向人真欲語憐爾獨含芳天
遠元無暑亭虛覺更涼莫歌采蓮曲鄉思正茫茫

五華山晚眺

雉堞參差鎖碧苔五華峯頂獨徘徊一城花滿香風透

六月山深瘴霧開蠻女半因輸布到邕人爭爲採金來

武侯廟食留千古獨向天涯酌酒杯

山上有諸葛武侯祠

六月二十八日重過海潮寺桂華盛開

葛勒山前古佛樓月餘重向此勾留兩行竹淨仍禁暑
一樹花濃已占秋香氣渾疑天外遠梵聲偏覺雨中幽
此間妙諦吾無隱爲問沙彌會得不

余到滇南而郭晴湖學使已按迤東諸郡頃移
黔中始於曲靖道上相見賦詩志別學使與余
爲友壻余喪偶十三年而學使今年亦賦悼亡
故次章及之

萬里天涯宦轍隨攬裾誰料竟無期三叉路口纔相見
又是搏沙放手時

謝家庭畔門吟牋裙屐風流記往年今日停尊聽秋雷
鰥魚一樣不成眠

老鷹巖

巉岩聳律鎖南陲萬疊黔山此最奇石峭尙疑鷹爪利

雲深翻訝馬蹄遲，千盤鳥道行難盡。
一綫天梯到始知，指點京華頻北望。
獨登峯頂立移時。

鎮寧州道中觀白水巖瀑布

晴光皎皎雲不生，兩耳忽聽千雷鳴。
仰看始知挂飛瀑，山泉併作聲鏗鏘。
白龍蜿蜒鬥神力，其鱗之而爭晶瑩。
銀山萬疊自天降，珠簾百尺當空橫。
浪花亂濺衣袖濕，怒濤欲填谿壑平。
憶昔錢塘值秋暮，孤舟恰與潮頭迎。
崩崖裂石恣澎湃，至今使我心神驚。
何意此間更奇特，懸流倒注無停聲。
得毋天孫掣淨練，滔滔汨汨銀河傾。
不知開先青玉峽，東坡有開先漱玉亭詩波涵雲亂誰輸贏。
惜哉

不遇蘇玉局無人爲我留公評

夢草亭獨坐適八弟定旃洛中書至

碧梧深柳宛吾廬短衲迴廊任所如孤艇忽從殘雨後
好山看到夕陽初池塘春草連宵夢宛洛秋風尺素書
莫向南天頻悵望畫圖終日正相於

哭蔡崧霞方伯

故人重對藕花風宦轍真如雪裏鴻豈料蛙聲喧井底
竟令蛇影動杯中崧霞以脾疾不起或云修龍井犯歲星所致千秋自有文
章在淡月還欣笑語同爲問虎賁能似否獨餘哀怨託

枯桐

九日東山寺

東山翠嶽送秋光，出郭欣然見夕陽。
佳節可輸陶令酒，好詩偏在贊公房。
風前烏帽寧嫌俗，巖畔黃花也自香。
却笑年年逢此日，一雙遊屐未能忘。

貴陽董龍寨民金昆以孝聞，親歿廬墓數十載。
未嘗入城市，今年九十有四矣。

貴陽古荒服，蠢愚安其天。中有獨行士，終身依墓田。
寧知烏鳥情，乃享龜鶴年。駐景良有方，要在至性全。
笑彼李八百，妄謂爲神仙。

除夕

家家也復換桃符忽見繽紛瑞雪鋪昨夜恰逢鄉信到

一尊況有故人俱

謂徐栗園觀察

金坡春早心頻往銅鼓山寒

興未孤聞說佳兒來定省客程何處飲屠蘇

仲兒來省尙在途次

迎春曲八首

蠻鄉也解學畝處處處雞豚報賽頻忽聽滿城簫鼓沸
竹王祠畔又班春

土牛禿速出城東綵燕翩翩到眼中漫說夜郎風太儉
一時村巷徧青紅

紅嫣紫姹擁春來誰爲天公費剪裁二十四番風信起
萬花都向者邊開

賣劍人人買犢耕八番九股慶昇平蘆笙一曲翻新調
便是烏蠻擊壤聲

笑騎白鹿與青鸞雪藕冰桃簇玉盤立部堂堂爭獻壽

春風贏得萬人看

黔俗迎春則備陳百戲使者坐堂皇
守令捧觴爲壽以兆豐年觀者如堵

例不
禁也

三郎坡下粲成行六洞橋邊走若狂
犵女蠻童齊笑語今年春比去年強

貔貅列隊喜春還銅鼓山高震百蠻
聞道官軍如破竹

饒歌先奏裔雲間

時聞大兵進剿
金川尅日功成

雪花昨夜大於拳晴旭今朝分外妍
萬里風和消瘴霧

聲聲歌出是豐年

桐華書屋絕句

印牀如水畫簾垂又是深春淺夏時
莫訝龔官才思減桐華香裏正題詩

謁諸葛武侯祠

祠在南明河北岸田山盤先生題額曰丞相祠堂

木瓜金筑

二地名

瘴烟開丞相祠堂鎖碧苔
岩洞至今銅

鼓在風雲當日鐵衣來
要扶六尺安磐石先向諸蠻關

草萊負弩何人知大義
千秋侍立亦雄哉

蠻帥濟火積糧通道率諸

羅爲諸葛前驅以功封羅甸國王土人塑其像侍俟側山麓先生爲之贊按史作火濟苗語則濟火也

聽雨軒

并序

黔故漏天然依山爲田其土恒燥且灌漑無所資
五日不雨則以旱告使者獨坐西軒適當好雨知
時輒爲吾氓以手加額故以聽雨顏之

黔靈山下曉烟深春雨連宵送好音淅淅暗添叢竹外
蕭蕭先到井梧陰對牀大有懷人夢捲幕差酬望歲心
獨繞長廊聽未足興來時復理瑤琴

題館師劉文定公手書後

太歲在執徐

特科網才俊夫子褒然舉金石聲早振出入

鼇禁中夙夜矢敬慎頭黑已三公壁立獨千仞憶昔依

臯比請業時旅進清芬念先人覲縷頻問訊誌墓力

闡揚銘座守忠信

公未遇時聞先府君宦蹟甚詳故爲撰墓誌又嘗謂謙恒樸誠且曰忠

信二字當終身守之

砥節期寒松立名戒朝薜公方度花甲霜雪

未到鬢謂當藉鍼石終身免疾疢胡爲大鳥翔四海失

楊震西風淚滂沱燭花墮餘燼三復尺素書寶之逾瑤

瑾

玉帶橋在龍井旁汲者踵接雖晴日猶苦淖竟

有墮者乃爲石闌衛之

玉帶橋邊泉水流轆轤聲動路如油往來井井人爭捷
行步兢兢馬亦愁添得闌干三尺穩便成圖畫一奩秋

詩人倘欲看明月路滑無須慮石頭

題國時齋廉使吟卷四首

宰官偏結靜中因句好能傳景逼真合受烟雲爲供養

維摩詰本是前身

卷中如日落山氣高秋風吹地白柳卧一溪烟村晚受烟多皆可入詩句

圖真詩中有畫也

烟月襟懷小吏知印牀收去便題詩無邊秋思蕭蕭夜

想見巴山細雨時

巴山一雨秋集中句也

鴻爪曾留翠靄間玻璃泉畔水潺潺吟來爨火寒烟句

勞髯重登第一山

余兒時隨先子官泗州今忽將五十年矣見集中人家依翠岫爨火雜

寒烟之句覺盱眙風景宛然在目

語言文字共誰傳獨對空明雪後天更欲相從攜智杖
一燈叅破祖師禪

種樹篇

并序

余所至必多植嘉木行吟其間以爲樂貴陽學官
貴山書院皆育材地也旣捐貲修葺因屬宋太守
昱
各種樹百餘本今年生意盎然爲之喜動眉睫
培其根而俟是在守者

平生愛樹若性命日抱甕盎荷鋤柄柔條老幹皆所欣
灌溉栽培不知病渴來黔中多童山荒榛野葛我心恹
課吏時舉齊民術勸農兼數花月令邇歲種植亦勤劬

沿村往往紅紫映睽彼泮林在城闕况有講堂踞山巖
儲材已將大厦扶樹木先思十年盛貴陽太守能知余
妙選嘉樹叅物性加之膏土葆溫和沃以寒泉得清淨
春到始知生意全雨足恰喜天工併預想天天桃實實
更期謾謾松風勁妙訣唯師郭橐駝笑談漫續李文正
李公擇種竹館中戲語同舍後人指此
竹必云李文正手植見東坡詩自注
苟得其養無不
長誰歟守者敬而聽檉櫚有遺灌樹同梧櫨休教棘棘
並綠陰他日倘如蓋拄杖吾當作歌詠

黑神廟

土人呼南將軍爲黑
神報賽者無虛日

巫覡紛紛歌舞頻割羊醢酒爲何人也知南八真男子

簫鼓鼓祠賽黑神

貴山書院左有陽明先生祠歲久不治余以奉

錢新之廼帥諸生行灌獻禮

天地苦榛狃無由開屯蒙往往賴賢喆聲教遂以通夜

郎古絕域道學誰爲宗豈知龍場丞廼暢鵝湖風苗犢

雖錯處性命理則同良知本孟氏諄諄提瞶聵石洞玩

爻象草庵殊從容

先生結草庵於龍場又有
玩易窩在陽明小洞天

但偕鹿豕

遊寧許魑魅逢一時講學者沂源流未窮如彼潮陽人

至今師韓公頑廉懦夫立冠服何雍雍我來瞻祠宇亟

爲勤垣墉落成薦俎豆縫掖諸生從升堂尋微言吾道

非虛空致知與力行相與爲始終請看新建伯磨崖紀
豐功表徊竟日夕皓月生遠峯

題衆香室 并序

黔撫署西有園一畝羣芳競秀香氣襲人余以丈
室爲供佛處因顏之曰衆香

鈍漢領吏局萬事都不曉唯恐大千界凍餒生煩惱夏
屋吾已慙安用卉木繞西園粲繁葩東風動芳草小齋
十笏餘醲醑氣環抱熙熙如春臺何妨雜蠻獠忽憶香
積佛香鉢眞法寶但分所食餘便將佛事了室以衆香
名晨夕供祀埽譬入梅檀林聊爲迦陵鳥稽首天人師

吾願良亦小可能乞殘飯使我衆生飽

九日雪崖洞

巖壑不在遠郊坰良可尋平生耽水石九日一登臨古
洞白雲靜僧樓黃葉深菊花摘盈把聊以滌塵襟

除夕守歲適制府以滇中瓜茄見餉賦之

瓜

滇南風物太鮮新遙識園丁摘取頻臘鼓鳴時催草長
春盤簇處見瓜陳分甘似得清涼散守歲何勞煖熱薪
願把綿綿書吉語也應強似頌椒人

茄

封題親向歲筵開照照瓊瑛又一堆翠柏已禁寒雪盡
紫茄先帶夏雲來製成魚脯堪傳座拾遺記淇漳之配
鯉脯以青茄
入芹菹合引杯從此咬春添味別鄭州蘆菹好同栽

示屬吏

并序

凡應發新疆改遣內地者皆罪惡貫盈去死一間
故配所脫追捕得卽斬例也然犯者時有廼飭所
司俾治本業爲衣食資并申明律令各懸銅牌鐫
逃者立斬四字庶觸目警心焉

去惡法必嚴矜全意逾至一綫苟可生邊隅俾安置蚩
蚩真愚氓稍縱廼卽逝火急追逋亡旣得那可貰辟若

池中魚荇藻足遊戲一躍思江湖翻入枯魚肆嘉彼良
有司頻爲饔飧計作息安其天狡脫更何爲奈無廣長
舌時時警聾聵不如藉頑金鑄以律令字使之佩終身
優游於

盛世

衆香園洗石作

山石來何自居然磊落姿一塵元不染三沐復何辭幸
謝泥塗辱唯期雨露滋搜羅心太苦拂拭計非癡結契
知誰可呼兄獨爾宜玲瓏分遠岫瀟灑映方池本以堅
難轉寧容素化緇臨流多逸興涼月照題詩

修武侯祠竣乃於其西隙地構軒三楹爲眺覽
所列岫參差雙橋環抱黔中山水之秀無踰此
者題曰振秀且繫以詩

佳境元知造物慳秀靈從此出塵寰
竭來紅稗烏菽地忽到天桃穉柳間
歷歷遠山真欲笑娟娟新月獨開顏
憑欄更愛雙虹鎖一片霞明碧水灣

衆香室坐雨

放衙聊却埽晏坐獨心清
山外白雲合堂前春水生
禽魚都自得竹樹總含情
忽憶東菑笠來朝好勸耕

乙未三月奉

命調黔兵二千進勦金川余親爲督送夜至黔西大雨
及晨而日出矣兵農無不歡慶

水西三月乍聞雷時雨時晴亦快哉襁褓人歌春澤透
旌旗隊舞曉烟開執爿倍覺追風易負耒無煩布穀催
使者此行真得計犒師兼抵勸農來

大定道中

舊是烏蒙地今爲列郡雄人烟密箐外城郭亂山中日

上寒威却

大定介黔西畢節間而地氣獨寒見日乃稍有春意

春來瘴霧空渥洼

定何處可有駿追風

大定威寧向產名馬

畢節口號

峯攢嶺簇忽康莊一片明霞照畢陽誰作五丁通蜀道

居人猶爲說奢香

明洪武間女官奢香始于此開道置驛

送兵至赤水見士卒皆踴躍渡河喜而有作

熊羆列隊耀關河遙指蠶叢喜氣多汗馬定能邀上賞

纈衣先已沐

恩波

時給軍士棉衣

烏蠻夜送銅鉦去赤水春催鐵騎過計日

犁庭飛露布懽呼聲早到牂柯

衆綠亭

芳草如茵拂水隈陰陰桃柳覆新苔眼前生意看無盡
又見紛紛夏雨來

雨後出郊循行阡陌見田禾滋長可冀有秋遂
至振秀軒小憩

出郭見南畝欣然獲我心
芄芃含雨足漠漠帶烟深
偶雨造幽徑因之暢遠襟
步欄聊縱目拄頰發微吟

上以征勦金川黔兵最爲奮勇此次抵川尤速
詔將前後征兵家屬各賞月糧以下優恤恭紀

頻聞敵愾被

恩賒爭願前驅効爪牙兒女共期申大義

君王翻爲恤其家宣來

黃紙通都樂捧出朱提舉室譁遙想軍中驍勇倍捷書

早晚報京華

黔靈寺

石磴秋雲接招提宿霧開入門唯翠竹大事訪黃梅法
界天花現空山落葉堆誰叅無上呪密諦證如來

時奉

欽定滿漢蒙古西番合璧大藏全咒恭貯於此

食桃

并序

衆香園中有桃二十餘樹結實大而甘採之得數
石旣啖賓僚遂逮吏卒僉曰嚮無此味余以先時
而採故不知其美耳戲作小詩

種桃始何年花發紅滿屋春風苦愛護花落子成族未

許曼倩偷月縱猿公撲秋至實如蜜雲漿灌我腹嘗新
聯賓朋分甘逮僮僕詫自綏山來一飽快所欲嘉果得
未曾懷核種之速豈知至味全多爲踈者辱採之非其
時醞釀故未足欲識中邊甜請待桃實熟

別黔中故人二首

春風著意送新晴忽聽陽關意外聲

龍眠獨識殷勤處
畫出陽關意外聲

東坡句也

可惜廿年前斷酒一杯孤負故人情

余自庚午止
酒已二十七

矣年

驛路寒梅動暗香壯懷忘却鬢毛蒼何時促坐思前夢
銅鼓蘆笙說夜郎

楊老驛

一路春風古播州梅花初綻柳芽抽居然有市喧雞犬
更復何人佩犢牛山氣暗催殘雪盡晴光先送曉烟收
試看九股苗皆樂始識年豐受澤優

清平縣作

笑兀山城枕水湄此間合有士欽寄不知誰似孫淮海
譚易猶能替九師郭青螺謂黔中學者有孫淮海李同
野馬心庵按孫公應鼂字山甫清平
衛人嘉靖癸丑進士官至南工部尙書謚文恭所
著有易談四書近語律呂分解教秦緒言等書

飛雲洞

巉巖千仞曉烟侵巖黠長留古洞陰不比浮雲能蔽日

須知觸石便爲霖梵宮花發占春意佛閣燈明見客心
忽憶年時題半偈箇中消息共誰尋

偏橋燈夕

黔中至此
始通舟楫

巖壘越三載今夕見恒河燈火春如此津梁興若何遠
峯看野燒隔浦聽蠻歌回首貴山下離心滿淥波

相見坡戲擬子夜讀曲歌四首

兩坡十里餘團團牛磨旋不能就郎懷猶喜見郎面
河梁一分手見面亦何爲不若坡上草步步能相隨
兩心如一心相視本無語倘能長相望願爲牛與女
下坡復上坡迴環看不已獨有我所思一別竟千里

鎮遠口號三首

潯陽城外好風來
烟景全憑旭日催
比似江南春更早
試燈時節碧桃開

邊隅慚媿說來宣
僂指風塵忽四年
却喜歸裝無長物
只須兩隻缺瓜船

萬山深處土田稀
種樹頻年計豈非
羸得今朝春水淥
一隄新柳盡依依

黔中皆山可耕之上不什一余每勸民種樹今柔條弱幹皆已成林矣

中元洞

并序

洞在鎮遠城外懸崖千仞下
臨潯水雲海倒垂深
廣可容數百人黔中第一奧區也在黔四載未及

一遊茲適繫纜其下廼帥仲兒協中直造洞天登
高眺遠覺耳目爲之清曠因同賦五言十韻

輕舸將鼓櫂峭壁復支筇暫與白鷗卽依然黃鶴逢雲
深誰面壁洞古忽聞鐘廣足千人庇虛堪萬物容空中
開瀉界巖際識禪宗席地唯芳草參天見古松山風何
謾謾泉水自淙淙蒼蘚留雙屐丹崖又幾重牛車參妙
諦鴻爪記塵蹤明日抽颿去迴看但遠峯

過辰州胡太守

承璽

署齋胡爲吾鄉涇縣人丁

己進士

大酉山圍月似銀五年前記踏輕塵那知蘭茝江邊櫂

重對粉榆社裏人
鰕菜且傾今夕酒
鶯花休憶故園春
獨憐逝者風流盡
題額空留墨瀋新
郡署采蘭書屋乃
亡友諸桐嶼守辰
時所
題也

桃源舟中

灘行十餘日
輕艇穿石縫
十里五盤渦
水溜不敢縱
舵師捷有神
篙櫂隨所用
使船若使馬
懸崖施磬控
老來怯風濤
舉足愁破甕
況當水石鬪
目駭心益恐
端坐紬殘書
聊以靜宰動
今晨過桃源
波濤清可弄
巉巖忽平遠
始覺天宇空
紅霞鋪綠津
鞞紋但微綜
一雙白鶴來
篷牕得清夢
唯乞南風吹
飄然五兩送

武陵寒食

春色怱怱禁烟武陵溪畔草芊芊問塗正買山中楫
上冢誰呼雨後船杜宇漫勞催客去桃花何事向人妍
今宵對月渾無賴不見松楸二十年

荆江懷古

江山萬里水連空荆楚當年割據雄落落日冠孤艇外
茫茫烟樹夕陽中漫憐八俊英名盡誰遣三分霸業終
一樣生兒是豚犬仲謀泉下恨無窮

南陽道中遇學使莊方畊少宗伯

博望城邊倦鳥還雲中仙鶴許重攀謾憐病後心猶壯

獨羨燈前鬢未斑。講學恰當伊洛際。論交合在紀羣間。
時命其季子出見。蓋冒懷磊落。今如昔。倚劍同看月。一
與夢兒同舉于鄉者。

汴梁春望

兩戒河山自此分。汴流終古接河濱。繁臺春暖唯黃鳥。
蓬澤烟寒祇白雲。至竟鼓刀餘意氣。漫從執轡見殷勤。
青青草色夷門外。付與詞人弔夕曛。

信陵公子行

信陵不學乃下士。諸侯徒聞有公子。大梁安危繫一身。
車騎勞勞駭市人。不想勛名震人主。但以恩讐相爾汝。

傳緒堂詩金
鐵椎枉殺魏將軍趣兵爲救平原君存趙却秦說猶可
十年不歸計真左歸後危疑竟奈何門外青蠅賀者多
英雄末路空醇酒豈惟鑠金由衆口趙王田獵何以知
應悔當年共博時

德州趙氏園中見芍藥憶辛卯初夏蔡崧霞爲
糧使讌客於紅藥闌前極觴詠之樂今崧霞已
歸道山而曹容圃觀察又督漕北去不得爲花
主人感舊攄懷得詩一首卽留寄容圃索和

婪尾花枝照眼紅華堂曾許對春風已知舊夢浮雲外
忽觸新愁細雨中艷影有情來廢圃酒痕無分近深叢

何時飛蓋西園裏吟斷彎彎月一弓

河問道中作

經術多由漢代昌日華官外送斜陽不知尊福鄉何在
誰爲毛公一瓣香

與河間太守陳履齋話舊時禱雨立應民皆頌
之

十年不見陳師道瀛海相看一笑同望歲已拚頭似雪
當官猶覺氣如虹但知疾苦爲吾事肯說甘膏是我功
漢室循良端賴爾風光休憶故園中

琉璃河對月

春光冉冉送行旌
風雨無端似不情
只有琉璃河畔月
照人今夕最分明

傳經堂詩鈔卷七終

傳經堂詩鈔卷八

丙申五月至己亥四月

蕪湖韋謙恒慎旃

五日對酒

頻年遠行役親朋隔萬里今年來京華追隨有二子

協夢

侍協中

佳節羅杯杵欣欣奉杖履紅榴對白髮景物良足

喜譚經正嶽嶽論史亦靡靡嬉戲若小兒百草闕未已
胸懷本陶然所得非綠螳迴首望故鄉競渡歌四起遺
俗自荆楚雙雙迅如駛簫管喧燈船綺羅照江水何時
賦歸歟芳洲采蘭茝闌入少年場高吟倚舵尾

題六叔父具山先生手書後

并序

先生諱新謨少有文譽顧終不得當於有司僅以
歲貢生老貧而好學年八十猶能作蠅頭字甲午
春手書見寄且貽以 春麓公周易解義卽以是
秋捐賓客嗚呼先生之爲人可知矣因涕泣識其
後

吾家有名士臣叔殊不癡獨抱遺經老羞邀俗吏知共
球先澤重松栢後彫宜尺素心猶在西風淚忽垂

七夕有感

泉下無消息茫茫十七秋那堪逢斷鴈更復見牽牛滄
海思前夢銀河起暮愁幾時呼妙子荒驛暫綢繆

升田兄以詩見懷用韻却寄

廿年兄弟隔雲端尺素殷勤爲勸餐
江上獨憐鷗夢穩天邊應識雁聲寒
彈蕉護竹心元苦種柳栽松計亦難
安得角巾趁歸櫂一牀風雨共盤桓

中秋對月寄兩弟

秋氣澄如此長安落木紛九衢懸皓魄
萬里淨浮雲桂香何處庭槐影獨分
江南今夜月賓雁定先聞

九日讀法華經寄江上故人

登臨何處故山園九日依然晝掩扉
白首倍思尋舊雨黃花差解伴晴暉
粗窺佛海元非佞未報

君恩敢說歸陽羨買田堅後約他年遲我釣苔磯

蒙

恩復入詞館恭紀

聖主恩波海樣寬

詔書忽下五雲端自慙舊業荒蕪甚彌歎前愆補採難

芸館從教添故事

京官鐫級例不得補翰林外吏
削職復入詞垣尤異數也花甌

更許結新歡蓬萊再到真如夢感激唯餘淚獨彈

題周少隱太倉稊米集二首

并序

少隱名紫芝號竹坡宣城人官晚而名不達自興
國守罷居九江貧不能歸遂家焉乾道丁亥陳天

麟帥襄陽始序其集鏤諸木淳熙癸卯陳公紹復

刻之今僅存鈔本

樂府篇篇絕妙詞新聲古意有誰知銅仙一曲傳哀怨

腸斷千秋杜牧之

李長吉金銅仙人辭漢歌爲杜樊川所激賞竹坡此篇殆欲過之

詩律精嚴好細論紹興時廼見斯人平生低首姑溪老

合與眉山躡後塵

竹坡見李端叔至自北於蘇源明之識元魯山可以不恨李故東坡門下

也士

至日寶善亭

紅日欣添一綫餘孤亭真覺是吾廬乍醒萬里歸來夢
更讀平生未見書石室可能探奧突金根只恐笑空踈

太倉竊祿知何補珍重分陰未敢虛

題申笏山副憲三分水二分竹書屋圖

下直悠然便拚關獨餘清夢到家山數椽縹緲雲烟外
只在空潭翠篠間

胸際汪汪萬頃寬不知何處有波瀾漁郎若解隨明月
儘許相從乞釣竿

千个森森漸拂雲溪塘十畝竟平分緣何苦愛檀欒影
勁節森森獨此君

六一堂前與不孤竹西真箇買山無欲依幾曲寒流碧
添種梅花三兩株

困學齋坐月

乍從玉署策歸鞍暫脫朝韉一倚闌
今月忽如今雨至
異書渾作異人觀戶庭以外非吾事
衾影之間許共看
只恐下民猶未免老來彌覺著鞭難

寄張惕庵先生兼示尹秀才

并序

先生名甄陶字希周福清人乙丑翰林爲劉制府
蘇村先生延主貴山書院能以經術造士足跡不
肯入官府屢稱老病余固留之諸生幸得人師無
不以學行相鏃礪甲午獲雋者遂至十八人及余
去黔衿佩依依餞送數十里外先生亦執手官亭

不忍言別余到京師猶得其手書頃晤獨山周牧
始知其以疾歸矣尹生耕莘其高第弟子也年三
十餘猶困於諸生忍飢誦經未嘗少懈事先生如
父日侍藥盥且親送至閩蓋尤人所難者廼賦詩
五百字問先生疾兼使尹生寓目焉

國家廣聲教儲英在膠庠書院設都會甄拔尤秀良臯
比非其人大義無由昌浮華僅糟粕膚學徒粃糠遂令
絃歌區或爲遊冶場我來貴山下君方開講堂五經辨
同異先生著正學堂五經通解一百三十四卷四書翼注論文四十卷二氏嚴隄防所
重在吾道豈徒許詞章多士從之遊藝圃時翺翔衣冠

黜奇表步履遵康莊實至名亦隨鹿鳴吹笙簪濟濟十
八人從茲升天閭何爲動越吟遽欲還其鄉披帷再三
讀一諾甫慨慷號舍恐或傾我爲勤垣牆餽粥恐未飽
我爲增糗糧余捐貲葺書院復復從拱把樹辨材撥梗
棹甲午榜後余親閱落卷擇其類異者八十餘人撤入書院肄業相期更滋植使之成
棟桷列名奏

天子具言教法臧

聖心獨嘉予特達真圭璋

奉命訪學行兼優者俾

院長學俊課嚴且品行端方與臣相處數年從無私謁或臣至書院與之講學論文亦無一語涉他事故再四勸留以爲多士矜式上嘉之
所惜居邊陲教澤僅一方安得君百

人落落爲宣揚鵝湖與鹿洞流風殊未央昨歲日在尾
鄙人干咎殃解龜返初服秣馬治輕裘子衿競追餞不
憚衝雪霜君亦臨官橋折柳彌徬徨道德相切劘佩服
安敢忘迴首初結交忽忽三載強折疑賞奇文時時踞
君牀我往君不來殊非報施常紛紛歎陽鱗誰能整頽
綱斯人信砥柱堪迴狂瀾狂一朝惜遠別鄭重擎離觴
始知譚道人千尺情汪汪經年不可見尺素申衷腸出
入我懷袖望遠空茫茫忽聞遶風疾秋風羸且尪良醫
不易得星言促歸航迢迢指海嶠道路何阻長尹生本
佳士日夕刀圭旁服勞弟子職負笈去閩疆古義有如

此相得乃益彰吾聞窮經者罔不壽而康伏勝及轅固
史冊非荒唐天君本寧謐外物何能戕无妄占可決奚
必求藥囊惟有隔顏色夢寐時相望作詩聊問訊覩縷
不厭詳遙知霍然起皎月延清光

僦居宣武門外書屋前有大栲樹一株余惜其
不材而可蔭吾廬也因名曰栲北精舍

寬綽無如此地宜空庭况有樹嶽寄儘容借蔭蟬先到
只許安巢鵲獨知好雨恰當三月暮清風不待十年遲
輪囷笑爾真何用合伴逍遙夜賦詩

東坡次韻伯固遊蜀岡送叔師奉使嶺表詩刻

石禪智寺王文簡司理時和其韻合一時賓從
餞送之作爲禪智倡和集謝蘊山守揚州翁學
士覃溪先生屬訪之蘊山拓原刻并賦詩以寄
覃溪答詩兼屬同人繼聲余得二章一呈學士
一寄太守

坡公一攜手竹西空鳴蟬殘詩留古剎斷碣埋荒烟新
城獨好事言尋蜀岡頻觴詠雜賓佐皎皎星河懸騎鶴
忽歸去悵望雲中仙子踞玉堂高唱追昔賢贈答頻
驛使湧若萬斛泉纖埃不敢到修竹何娟娟詞翰况雙
絕筆勢驚鴻翩迢迢六百載一笑應迢然

憶昔訪隋寺，咩咩聞新蟬。漁洋不可見，寂寞含雲烟。宦
遊儻萬里，霜雪盈鬢顛。惟有禪智碑，使我夢寐懸。時時
展響榻，晤對玉局仙。豈期卅載後，復見謝朓賢。欲攜一
尊酒，更汲第五泉。月明卧禪榻，相對吟嬋娟。蠟屐興不
淺，南望情翩翩。腰腳吾猶輕，來及紅藥然。

寶善亭校書呈同館諸公

熙朝右文古，未有四庫卷。軸連雲霞邇，年遺書蒐海內。
更如河海無津涯，蒼萃全書寫善本。文淵閣新詹

牙設官分職鉅，典備文學侍從頭銜加。

時建文淵閣貯四庫全書鈔

本設領閣直閣校理等官爲儒臣兼銜

蓬萊小別四五載，顧瞻玉堂頻嗟

呀何意重來校中秘却將菅蒯儕絲麻感

恩唯有揩兩眼別風淮雨勤搯爬淨埽仍恐木葉落細
披敢憚恒河沙從來讀書期識字旨以譌舛留疵瑕所
歎胷中塞塵坱便便腹笥休虛誇偏傍點畫湯塗竄毫
釐得毋千里差君不見前有韓昶金銀車後有田敏白
及花

田敏不知日及改
爲白及見宋史

陶然亭秋眺

笑兀空亭倚鳳城十年重見舊題名乍看野水心俱遠
忽對黃花眼倍明送客正隨鴻雁去餞秋聊與鷺鷥盟
偷閒更擬春來後斗酒雙柑此聽鶯

得雲南孫補山方伯書却寄

六詔蠻烟萬里開迢迢天末尺書來茯苓幾處和雲刷

蒼荀何人帶雨栽真遣瘡痍成樂土

貴筑莊明府爲制府奏調滇中補

山時爲學使贈詩云莫將恩怨酬知已須遣瘡痍化樂郊最得風人之旨故以此語頌之蚤知康濟

賴殊才湯勞紅鯉投膠漆甚日京華共酒杯

恩賜哈密瓜恭紀

促坐頭廳檢秘書甘瓜

頒賜重璫璵一盤虎掌分嘗後萬里龍沙入貢初舌本

醍醐應不減胷中冰雪更何如右文

聖主恩波濶異數端宜紀石渠

向惟王公大臣始拜哈密瓜之賜今徧及

館臣蓋從來未有
特恩也

真定王孝廉發傳以學行稱余戊子分校順天
所得士也其孫定柱年十七舉於鄉捧乃祖手
書來謁二首

十載不相見尺書天外來談經知健在述舊獨裴回忽
憶秋風裏頻聞落葉催熒熒官燭照三豕賈疑猜
王生卷膽
錄草率幾不能讀余閱至三鼓始辨其謬脫
百餘字幸不失此佳士來書猶娓娓述之

邕兮何婉孌轉眼便成童世舊孔文舉家傳鄭小同相
期式古訓端不媿宗風萬里丹山路呦呦曲乍終

重過法源寺

人海太茫茫重來問法王十年頭已白雙樹葉初黃舊
識僧誰在前生夢未忘徘徊鐘磬裏不覺又斜陽

山東曹容圃糧使聽泉圖三首

陶寫無勞竹與絲浪翁水樂最相宜雲山韶濩餘音在
彷彿明湖月上時

石畔濺濺初沸鼎山頭汨汨又鳴雷須知水性本來靜
畢竟聲從何處來

曾訪泉源倚瘦藤筆床茶竈晚烟凝何時陪尾山前去
同向聲聞悟上乘

人日寄家書

春風動鄉思人日忽題詩試問南榮下梅開第幾枝

送吳澹軒少宰歸老少宰曾官南河總督今以

嗽疾乞歸

數厯兼中外聲名五十秋白頭懸藻鑑赤手障狂流病肺偶然耳歸心留得不昨宵春水長好爲送扁舟

秋林講易圖余督學濟南時作也錢樺石閣學爲題二詩并述湖山樓館之勝吟諷不置次韻

答之

講易誰能替九師風光聊記嫩涼時半庭烟水雙雛共

時協夢一卷湖山萬里隨會攜此圖人與我輩生涯空復雨中

年結習究何爲無端指點高談處賺得先生又賦詩

濯纓橋畔未同遊可惜相睽竟五秋

余於辛卯冬去濟南閣學於丙申秋

始山好最宜傾淺濺波明誰與弄輕舟已忘桑下人三

宿忽記花前雨一樓問事不休公不媿諸生應憶賈長

頭

移居橫街宛平相國怡園舊址也漫成長句并

邀馮魚山寶芝軒兩庶常同作

半畝荒園枕碧苔小亭容我日裴徊斷無熱客侵書幌

合有門生共酒杯松石尙能邀月到鶯花偏爲逐春來

平津車庫尋常事湯說當年蠟淚堆

聞湯辛齋學使歿於粵東舟次

并序

辛齋諱先甲字萼南宜興人辛未進士由翰林改御史升內閣侍讀學士以事被謫尋蒙

恩復授編修督學廣東余與辛齋同年貢太學相知最深聞其歿也不能無詩

四海論交久錚錚見此人相期唯道義所得在清貧歸夢孤舟斷吟魂萬里親西風吹老淚中夜獨霑巾

同王詒堂中允怡園晚坐

夙昔耽寂寞隨地可常住茲園雖荒蕪松石苦愛護朝來見西山恍與素心遇閒雲任來往安問新與故茫然

聞足音故人忽我顧笑言脫形骸歌歎忘世務譬彼林中鶯飛鳴得天趣坐久不覺疲涼月墮庭樹

送蔣時庵少司馬歸吳門兼呈彭尚書芝庭先生

聖心偏爲老臣憐去國剛過杖國年鄉夢已飛吳苑月風帆先送潞河船草堂猿鶴應無恙故侶鷓鴣況有緣誰向屏風能畫取姑蘇臺畔兩神仙

郭司業

毓麟見過并序

辛卯山東鄉試以耄耄蒙

賜舉者三人郭其一也今年九十有八矣赴春官試不

第復荷

殊恩拜官司業雨中見過執弟子禮甚恭余親爲撰杖

賦詩一篇贈之

眼中哭兀見方瞳爭訝神僊下紫穹臺閣乍宣

黃紙詔師儒端賴白頭翁談經卽是延齡術受福都緣

樹德功

司業皓首窮經與物無忤
鄉魯間無不道其學者

太息董孫偏老去不

教同拜

帝恩隆

壽光董書宗濰縣孫斐與司業
同賜舉今董孫皆下世

六月五日爲先考溧陽公生辰

萊綵拋來卅載餘忽逢今日倍欷歔百年鼎鼎顏難駐

先考
生於康熙
已未
今百年矣
萬古茫茫夢亦虛
頭白尙能思所嗜

燈紅空解讀遺書
若堂若斧何時就
風雨寒江守敝廬

先人至今未葬
每一念及不禁淚下如雨也

次答馮魚山庶常見和移居之作時魚山尙寄僧寮頗切歸思故及之

一痕疎雨送秋苔
忽見新詩讀幾回
龍象座邊堪挂笏
雁鴻聲裏漫停杯
肯令湖海將心去
須遣風雲入腕來
暇日尙能頻詣我
不妨長對亂書堆

四松亭

秋風催落葉斜日照高松
謾謾聲何勁青青色倍濃
亭

邊餘石磴戶外卽雲峯頓覺著書嬾張琴答遠鐘

恩賜鮮荔支恭紀

玉堂鈴索動秋風荔子新頒出禁中洗盞正思浮淺
碧登盤忽訝擘輕紅乍來海嶠香仍在試比天漿味畧
同慚媿頭銜稱著作賦才誰似曲江工

接葉亭看秋海棠作

獨抱柔情向明月白石階前太愁絕西風吹作滿庭秋
不教人憶臙脂雪銀河耿耿照孤根相期何處爲銷魂
却疑雲錦裳初就婀娜忽化此花身無言有恨君知否
一鼓相對低吟久好憑天女試參禪願把金尊長在手

七月二十五日夜坐忽憶去年今日與洪東平
輅門情話而洪弃人間世已二百餘日矣

長安葉落夜沉沉何處雙鳬許重尋殘臍尙餘書札在
隔秋會共酒杯深野無佩犢真循吏壁有懸魚見苦心
聞道東平諸父老至今哀痛有遺音

送邵明經南歸

長安居不易況已十年逾吾道空雙鬢鄉心忽五湖秋
燈尊酒盡暮雨片帆孤屈指還家日團圓月正俱

程何兩生至言貴山書院所種樹已成林

貴山山上講堂開弱榦柔條手自栽別後不知春尙在

滿庭招得好風來

重過尹文端宅與諸郎君話舊卽送兩林都統
之官黑龍江

摳衣重躡後堂塵元老經營澤未涸南國祇今歌蔽芾
西園猶記藝勞薪平泉草木人爭敬謝墅芝蘭我最親
此去建牙應努力傳家節操是清貧

中秋待月二首

桂子香從何處飄瓊樓玉宇望迢迢憑誰盡掃浮雲去
明鏡團圓出九霄

絃管聲中夜半時廣寒仙子故遲遲人間大有凭闌者

說與秋風總不知

九日四松亭同孫寄圃檢討作

萬里風都靜重陽景倍清秋光有如此虛室復何營相
與坐深樹悠然生遠情黃花看不厭遙共夕陽明

武進程冢宰慎餘堂落成招同錢璵石閣學陳
楓崖光祿王惺園少宰褚筠心學士吳香亭太
常董蔗林少司農看菊

一簾晴日帶烟斜秋色先看撲絳紗正喜華堂開綠野
肯令佳節負黃花魚蝦入饌沾鄉味鴻雁橫空憶水涯
聞說河流到江北每停尊酒一咨嗟

中州黃水湯溢直
注亳州蒙城一帶

吏加意撫卹

特諭大

曹習庵官允至自畢秋帆撫軍署中

點點秦雲照眼來三年幕府壯遊回明珠翠羽能多少
費盡人間八斗才

繡嶺東西枕夕陽朝元高閣太荒涼不知三月春寒裏
曾試華清第幾湯

六秩行當啟一篇東坡五十九歲作也余明年
亦六十矣因和其韻并用起句

六秩行當啟蕭蕭鬢髮疎每紬前代史

時借王芥子李
文園吳稷堂諸

君子分纂
明史本紀時聽故人車萬里都陳跡三廳是我廬江豪

仍未禿或免不中書

六秩行當啟方知學道疎立身防履鼎握管歎虛車行
藥頻依檻焚香每閉廬祇應戴安道好伴我鈔書

謂及門二

三子

六秩行當啟生涯計太疎少貪青李帖老愛白牛車霜
雪尊吾道鶯花憶故廬紙牕燈火夜誰寄數行書

六秩行當啟冰淵志敢疎識塗慚老馬守轍戒賁車兄
弟憐餬口兒孫幸繞廬前身疑脈望坐卧一牀書

送陸朗夫方伯歸養

海內真方伯如公有幾人委蛇憐鄙屋懇惻動

楓宸郁黍留餘澤萊衣及好春三高祠不遠可許結比

鄰戡有卜居
吳下之約

哭申拂珊副憲

夜雨論詩記眼前丈人何意竟生天愁看白髮三千丈

獨抱寒氷四十年

副憲官中書卽入
直贊機務垂四十年矣

緘口肯言溫

室樹低頭空憶蜀岡泉撫棺此日增長慟典到朝衣劇

可憐

褚筠心學士齋中盆梅初放同陸耳山學士張

涵齋侍講曹習庵中允賦絕句三首

錦幕重重護雲屏曲曲探一枝香忽動飛夢到江南

將開未開花意欲笑不笑天真莫認徐妃半面好參迦
葉全身

標格居然秀可餐地鑪深處不知寒無人說與林君復
莫待籬邊水際看

臘八日馬上作

騎馬方知節候和閏年春喜兩頭過

諺以兩春夾一冬
爲天氣和煦之驗

纔看臍到分僧粥早遣冰開見禁河東郭漸來風習習

西山無復雪戔戔鳳城淑氣應先到轉綠迴黃景正多

除夕前三日筠心復招飲盆梅花下賦詩見示

次韻答之

恩恩又是歲闌時
索笑尊前手共持
消受春風無限好
燈紅酒綠鬢如絲

定瓷珍重護新芽
那許繁葩鬥物華
爐火不勞相煖熱
十分春已到君家

兩兩同心耐歲寒
藏鈎深夜酒杯乾
道場合有天花現
湯作尋常瘦影看

除夕

義和衮衮不停驂
白髮偏將絲勝簪
略舉鄉風唯守歲
好圖家慶是分甘
占年預想兩岐麥
拜

賜先邀三寸柑

是日蒙賜柑橘諸果

遙望

九閭頻蹈舞絲毫無補獨懷慙

上元後二日同人小集四松亭賦詩見贈次韻
答之

答耳山

當年絃管地寥落剩蕭齋車庫休增感鶯花也自佳春
風吹短髮幽興落青鞵況有詩人在相於共一街
何處吾廬是浮生託旅亭雲深容小住松古爲誰青遠
岫頻揩眼空林但守形裴徊過日夕商略抱遺經

答筠心

天留半畝著吟身開徑還邀客到頻四面闌干先得月

六街燈火尙爭春燕巢自喜泥猶濕牛磨何妨跡已陳
試向松根聊縱目西山隱隱見嶙峋

平泉草木未全空謾謾松濤入晚風得地恰宜梅竹伴

昂霄方識雪霜功尋聲何處來歌板

是日聞鄰家度曲

覓句無

心問漏銅莫訝孤亭太岑寂此間烟景正無窮

答習庵

童童松影現全身樹老欣無翦拜頌已闕冰霜成本性
便偕花柳作陽春月明好抱孤琴至亭小堪容片席陳
况有瓊瓏山石在眼前誰與並嶙峋

自喜樽中酒不空故人相與對春風苔岑廿載緣投契

墳典千秋且策功
牆脚漸看抽碧斲
杖頭底用挂青銅
時有醪飲之
約故戲及之不嫌蔬筍邀同訓
排日凭闌興未窮

四松亭前桃杏盛開皆余手植也欣然成詠

松石雖云古空亭亦寂寞
花樹乞園官移根自西郭
詎爲十年計聊取三春樂
細雨抽新條生意透紅萼
牆角殊盈盈階畔何灼灼
徜徉在花下吟思欣有託
誰能載尊酒相與共斟酌

同筠心白華耳山習庵集涵虛嘉樹屋作

長安今年春氣早二月花繁開未了
忽看新綠漸成陰
嘉樹扶疎插雲表張侯爲我傾金尊
三五同調如弟舅

我雖止酒興不淺幕天席地誰能嘆憶昔吳郎住此屋
翩翩厨顧相徵逐烏絲著句日偏長紅燭看花夜未足
一彈指已廿年強雲龍誰與偕迴翔晨星落落趨朝請
安得風前頻舉觴唯有空庭餘老樹曾見當年歌嘯處
今宵不樂將奈何劇飲無須視蚤暮丁丑戌寅間吳杉亭居此嘗與祝豫堂錢蕐石謝金圃王禮堂梁山舟陳寶所王述庵蔣心餘吳二匏錢辛楣諸公文酒唱酬及重來京邸而豫堂二匏已成逝者杉亭禮堂山舟辛楣相繼歸去同官日下者又以職牽不得時相聚處無復曩時觴詠之樂矣

同曹習庵中允法源寺看海棠

聞說天花作道場獨將幽艷占韶光不妨一笑來初地
況有同心對夕陽樹老幾經滋碧蘚春深依舊試紅妝

東皇雨露元無盡稗柳天桃未許狂

宿謝東墅少宗伯西苑寓園作

又是西牕翦燭時畫簾深處雨如絲五更車馬聽來熟

萬里山川話到遲

時談及滇黔山川之勝

獨抱殘經仍說禮

東墅方纂

儀禮未除豪氣更論詩一牀况有難兄共

謂令兄東君此部

此樂

頻年詎易期

四月朔日筠心白華習庵涵虛耳山小集有椒

書屋分體得五言長律

小圃春無盡薰風倏已過物情欣長養烟景自清和牆
外椒花發階前樹影多偶然開別徑宛爾得新窩臭味

應相合詩篇好共哦微香心早沁嫩葉手頻搓

嫩葉獨香試之

然果遠興生紅藥幽懷到綠莎亭虛供徙倚石古任摩挲

讀畫防蠅污繙書識豕譌千秋名底用三益樂如何但

遣琴尊足安知鬢髮皤故人堅後約明月更婆娑

是日遲蔣

清容秦簪固不至擬於月夕更暢聚也

傳經堂詩鈔卷八終